

Tiòh 災 kap 普世

無將人點名做記號，見若人攏全款，攏是主 ê 百姓，就是一款「普世精神」。

文 | Chiòh Bók-bín 石牧民／國立臺灣師範大學兼任助理教授，知罪難改基督徒

全世界咧 tiòh 災 [che]，疫情到 taⁿ 已經成百日。論到咱台灣，穢著病毒--ê、死亡 ê 人數，攏較少世界普遍 ê 狀況；咱 ê 防疫成果，通世界 o-ló。咱 ê 百姓、百工，咱 ê 學生囡仔，照常 choh-sit、讀冊。表面上，現此時台灣袂輸全世界「上特殊 ê」國家；論真，咱是靠耶穌基督所教示「普世--ê」精神才有通 án-ne。耶穌苦勸咱：「著愛疼厝邊親像疼家己」；也就是無掠家己做「特殊」，反倒轉來看家己 kap 別人普遍攏無各樣。對 án-ne，有法度將對家己 ê 疼「普遍化」hō 厝邊。若具體來講，咱喙罨 ê 產能猶未達到逐家攏有份彼陣，咱會曉想：「相分食有賸，相搶食無份」；咱為著疫情驚惶彼陣，為政者，指揮官陳時中會曉提醒逐家：「見若人攏無想欲破病，chóng--sī，社會若將破病 ê 姊妹兄弟點名做記號，致到您姑不而將想欲逃閃、掩埃，顛倒對防疫不利。」

無將人點名做記號，見若人攏全款，攏是主 ê 百姓，就是一款「普世精神」。基督徒知影，獨獨上帝會當將人「分別做聖」，人家己無才調主意。對 án-ne，咱看家己、看別人，干焦孤一步：上帝彼步，普遍疼 kap 伊同行 ê 人。

咱為著 án-ne 來感謝上帝。感謝上帝賞賜咱夠額 ê 知捌、夠額 ê 氣力，hō 咱 tī tiòh 災、烏暗 ê 山谷內底，較贏死失，較贏彼个試；hō 咱靠上帝「相分食有賸」，靠上帝行「五餅二魚」ê 神跡。



耶穌苦勸咱，「著愛疼厝邊親像疼家己」。(圖 | 李厚諭)



【編者按】本文影音檔，請掃描QRCode。